

Joibe 14 S. Eliseu	Domenie 17 S. Rainir di Pise	Miercus 20 S. Metodi	Il proverbi Robe robade no à ni pàs ni durade.	Il soreli Ai 13 al jeve aes 5.15 e al va a mont aes 20.58.
Vinars 15 S. Proto	Lunis 18 S. Gregori	Il timp Zornadis serenis cun aiarin.	Lis voris dal mès Rarìt lis plantis cressudis masse, gjavait lis menadis dai pomodoros e cimait i fasùj rampighins.	La lune Ai 20 prim cuart.
Sabide 16 Ss. Quiric e Giulite	Martars 19 S. Romualt			

lis GNOVIS

LIS VENDEMIS DI «ANFFAS UDIN» A coventin volontaris

A coventin volontaris pes ativitàs di autonomie e di inclusion sociâl inmaneadis di «Anffas Udin» a pro di personis cun disabilitât inteletive o relazionâl. L'apel al torne urgjent in prevision dal I stât. Dai 21 di Lui ai 4 di Avost, la clape e propon il «Soggiorno a Caorle» par 15 fruts, che al tire a di lunc dibot di 30 agns. Cun di plui, si è daûr a organizâ une altre vendeme a Kranjska Gora, in Slovenie, dai 21 ai 30 di Avost. Altris ativitàs che a domandin la colaborazion di volontaris a son chês dal «Gruppo Giovani», cun jessudis ricreativis vie pes domenies e mès par mès sul teritori, e il progjet «Diversamente Doc» pe promozion dal inseriment lavoratîf in agriculture. Cui che al vûl colaborâ al pues contatâ «Anffas Udin», telefonant ai numars 0432 299180 e 340 6619476 (Erika Pontelli) o ben mandant une letare eletroniche a: anffasudine@libero.it.

CONCORS PAR CJANTIS INEDITIS «CantaFestival de la Bisiacaria»

Autôrs, musiciscj e poetis dal Teritori a son ingaiâts te diesime cuite edizion dal «CantaFestival de la Bisiacaria», il concurs musicâl plui impuartant de Comunitât bisiache dal Friûl, che e vif tal mandament di Monfalcon. Lis cjantis pal concurs, scritis par bisiac e ineditis, a varan di rivâ li de Pro loco di Monfalcon dentri dai 10 di Avost. Si pues concori in dôs sezions: par melodiis tradizionâls e par melodiis dal di di vuê («pop», «rock», «jazz», «rap», «funky» e vie indenant). Il regolament al è publicat tal lûc internet www.monfalcone.info/?cat=3. Te organizazion, a colaborin ancje lis clapis «Gruppo Incontri Bisiachi» di Monfalcon, «Associazione Culturale Bisiaca» di Roncjis e «Gruppo Costumi Tradizionali Bisiachi» di Turiac.

DÔS SERADIS A COLORÊT Su la strade di Sant Jacum

La gleseute dai Sants Zuan e Pauli di Colorêt di Faedis e vierzarà lis sôs puartis, ai 18 e ai 19 di Jugn, par dôs seradis dedicadis a la strade di Sant Jacum di Galizie e ai pelegriņaçs viers il grant santuari european. Vera Paoletti e animarà la iniziative, inmaneade de «Pro Loco Colloredo di Sofumbergo», a 20.30, e intitulade «Ognuno ha il suo Cammino... verso Santiago di Compostela». Te prime serade si cjacararà dai tocs di strade di Roncisvalle a Nájera («Sul Cammino francese in Spagna») e di Nájera a León («Fra silenzi, mesetas e cattedrali»). Tal indoman, si frontarà la tierce part dal pelegriņaç, di León a «Santiago de Compostela e oltre...», io ricomincio dai Pirenei».

«Robant la cjera, a si gjava di bocja il pan ai plui piçui e ai plui debui»

Il scandul dai laris di tiere

Il scandai «I Parons de Tiere» al è curât de Federazion des organizacions cristianis di servizi internazionâl «Focsiv» e di Coldiretti

IN «PLAN DAI ÂJ, ai veve un cavil di cunfins... Ai fâs vègni il pretôr a fâ zurâ. Alore Silverio al veve tacât tas zucules cjere dal so ort. Alore al disè cussì che la cjere ch'al pescjave a ere sô. Alore al è stât danât alassù a picâ: ogni volte ch'al è tristimp, a ven jù la Muse come un torent di paltan». La antighe liende cjargnele, cul lari di tiere Silverio condanât cuntune pene tremende par insegnâ a la Comunitât che «Robant la cjera, a si gjava di bocja il pan ai plui piçui e ai plui debui» e par ufrì une «morâl» in stât di motivâ ancje i disastris naturâi plui spaurôs, ur tornarà iniment a ducj i furlans che a learn il scandai «I Parons de Tiere», curât de Federazion des organizacions cristianis di servizi internazionâl «Focsiv» e di «Coldiretti» e disponibil su la rêt des rêt, a la direzion: www.focsiv.it/wp-content/uploads/2018/04/i-patroni-della-terra_OK2.pdf.

Il studi al profundis il scandul mondiâl dal «Land grabbing»; cun chest non inglès, di cualchi an incâ, si à tacât a definì lis robariis massivis e lis usurpazions continuadis di tieris che a son daûr a escomiâ des campagnis di dut il mont miârs e miârs di fameis contadinis e di Comunitâts rurâls, obleadis a cedi in face de prepotence di stâts, di aziendis multinazionâls, di societâts finanziariis e immobiliars.

Intai ultins 18 agns, seont «Focsiv», a son za stâts incaparâts 88 milions di etars di tiere e il ladroneç al tire a di lunc cence padin e cence slaifs. Il risultât a son fan e miserie, criminalitât e vueris, espulsions e migrazions sfuarçadis, distruzion dal ambient e dissipazion de biodiversitât.

«I Padroni della Terra. Rap-

porto sul Land Grabbing» al è dividût in 5 cjapitui. Tal prin, si presente lis carateristicis dal fenomen e si sclaris la sô dimension globâl. I 88 milions di etars bielzâ strafuîts a son concentrâts tai País plui puars de Afriche (massime Republiche democratiche dal Congo, Sud Sudan, Moçambique, Republiche dal Congo Brazzaville e Liberie) e de Asie (dulà che il País plui colpit al risulte Papue Gnovè Guinee). In dut câs, la situazion e je grivie ancje in País calcolâts «emergjents», sicu Brasil, Federazion Russe, Indonesie e Ucraine.

I 10 País plui atîfs tal «Land grabbing», al ven a stâi chei che a invistissin di plui par comprâ o par fitâ colts, mediant di contrats pelôs, a son: Stâts Units, Gran Bretagne, Olande, Cine, Indie, Brasil, Emirâts arabis units, Malesie, Singapor e Liechtenstein. Ancje se si stente a capî dal dut dulà che in azion a son i guviers o ben impresis multinazionâls che a operin su plateformis «offshore» (come Bermudas, Virgin Islands, Mauritius e isulis Cayman).

I invistiments a rivuardin tant tieris buinis pes culturis alimentars che tieris pe produzion di biocarburants, cence lassâ fûr sfrutament e distruzion des forestis e invasion di tieris agriculicis o naturâls cun zonis industriâls e turisticis. Sun chestis cuistions e veve reclamât atenzion ancje la gjornaliste udinese Franca Roiatti, che za dal 2010 e veve publicât cu la Universitât «Bocconi» di Milan «Il nuovo colonialismo. Caccia alle terre coltivabili».

Fra i protagoniscj de usurpazion mondiâl di tieris, e fâs la sô part ancje la Italie, che e à fat invistiments su un milion e 100 mil etars, sore il dut in Afriche e in Romania. I contrats firmâts a risultin 30, in 13 País forescj. Ma



Silverio, rapresentât dal scultôr di Çurçvint Domenico Adami.

la situazion taliane e larès tamedade ancje par popularizâ ducj i câs di tieris robadis chenti, cemût che a àn fat tal studi dal 2012 «Terra e agricultura». Il caso italiano» Mauro Conti e Antonio Onorati, chei dal «Organismo Sardo di Volontariato Internazionale Cristiano» tal documentari dal 2014 «Terra persa» e chei dal «Forum dei Movimenti per la Terra e il Paesaggio»; ma ancje cemût che a contestin i opositoris des «dismissions di terens publics» (che a saressin dome un mût par favorî la grande proprietât e la speculazion edilizie) e cemût che a contindin i difensôrs di chei Dominis coletîfs (ricognossûts de Leç statâl 168/2017) che a son fats passâ e che a son amistrâts come se a fossin proprietâts dai Comuns.

Il secont cjapitul de vore, imbastît cul jutori dal Centri pai dirits umans «Antonio Papisca» de Universitât di Padue, al scrutine la normative internazionâl amaint che, in zornade di vuê, nol è

ancjemò no stât ricognossût fra i dirits dal om chel dai contadins e des Comunitâts a la tiere. Tant e tant, e je daûr a slargjâsi la sensibilitât sul ricognossiment dal «acès a la tiere» come cundizion essenziâl par realizâ une vore di dirits umans za ratificâts (come chel dal pan necessari, de cjase, de aghe, dal lavôr, de proprietât e de identitât dai popui natîfs).

Il tierç e il cuart cjapitul dal scandai a studiin doi câs particolârs di «Land grabbing»: chel dal Ecuador e chel dal Myanmar.

L'ultim cjapitul al proferis l'impegn di «Focsiv» e di «Cisde», che e je la aleance des organizacions internazionâls catolicis pal svilup sostignibil. Dutis dôs lis Federazions a operin par difindî lis Comunitâts locâls, par judâlis a miorâ la sô vite cotidiane e par compagnâlis te lote cuintri la pression des impresis e dai guviers, che a smirin di incaparâsi lis lôr tieris.

MARIO ZILLI

PERAULIS in DISMENTIE

• par cure di MARIO MARTINIS •

SALUSTRI

s.m. = sereno, chiarore passeggero in un cielo annuvolato; limpidezza dopo la pioggia (il solustro nei dialetti dell'Italia centrale è il riverbero del sole, voce dotta dal latino lastrum)

Al pareve che al ves vût di vignî biel timp, ma al è stât dome un salustri. Sembrava dovesse venire bel tempo, ma era solo un chiarore.

SBILFE

s.f. = persona impetuosa; intollerante (origine dubbia)

Taresie e je une sbilfe di frute. Teresa è una bambina impetuosa.

SCARABOTADE

s.m. = boato, frastuono, strepito che scuote (forma deverbale di scarabotâ "aver suono fesso, specialmente di oggetti cavi di legno")

Cheste no je la solite scarabotade. Questo non è il solito frastuono.

SAVOLTÂ

v. = rivoltare, travolgere; scompigliare; svolazzare; sconvolgere (dal latino *voltare (*volvitare), iterativo di volvere "volgere")

La vuarzine e à apene savoltât la tiere, cumò e je pronte par semenâ. L'aratro ha appena rivoltato la terra, ora è pronta per le semine.

SBOSEÂ

v. = tossire con insistenza (dal latino ex- vocare)

Ce che al sbosee Meni usnot! Come tossisce Domenico sta notte!

SPIC

agg. = aguzzo, acuminato, appuntito (dal latino spiculum, diminutivo di spica "punta")

Mi cjolaressitu un curtis a spic, par plasê? Mi prenderesti un coltello appuntito, per piacere?